

冬
青
館
乙
集

冬青館乙集目錄

賦一首

詩一

掃花山館集六首

勞薪集七首

湖樓集十六首

檣谿拾橡集十五首

過江集七首

望雲集四首

冬青庖集十四首

蕪城集四首

後冬青廬集十二首

詩二

北征集二十首

南游集七首

寄阮集十七首

疆桐館集十一首

淮南集三首

臨頓里集十二首

林屋洞天集十六首

桑苧園丁集十首

痺風集二十六首

井叔集二十四首

文三

釋一首

論一首

策三首

解一首

辨一首

攷四首

文四

記二十五首

文五

序十七首

文六

書一首

跋書後十九首

文七

跋書後二十八首

文八

傳十三首

碑五首

銘一首

贊三首

墓志銘表五首

祭文一首

余旣自刻甲集同儕咸見爲少於是王硯農臺叔
昆季雜取叢稿以去將先爲清本聞川計君二田
遂先刊詩二卷硯農又奔走四方凡有文事諸家
遞相惠懇咸有欵借越五載梓尙未竟今春得沈
君升甫相助升甫余故人柳橋哲嗣卽前爲余襄
校甲集者也從知事必有緣而凡事先後一轍終
克集成然朋友之貺不敢忘也至於其中妍醜人
知之余自知之棄取亦不復自主用不敢問序於
人時方將司教武成愬愬不遑多述聊誌其艱苦

云爾丙午七月烏程張鑑識是年七十有九

冬青館乙集卷一

烏程張鑑秋水

賦一

第一樓賦并序

蓋聞景怡治學然糠見慕於及門隣士講經織簾不辭
乎別舍蠡斯鳴則草蟲躍雕虎獻而清風生物類相召
古今一致何況文翁治蜀郡人不仰其風猷辭漢明韓
博士羣遵其章句也哉吾師儀徵夫子莅浙之明年慮
古訓之式微懼俗學之不殖爰於西湖築詒經精舍置
生徒其中遵甲乙之科擬金匱之賞將以紹徐謁卿改
倣就善之謀矯鐫子駿樂成慮始之誠上則儲蓄作以

備

嚴更之選下則立頑懦以資石室之藏昔東萊纂述甄拔者何多安定名齋設科者不一有唐有涂先正之堂爰立爲塾爲序退息之室式昭其南有樓名傳在昔集多士宣講說春風和化雨治紉奧義於藝林縣訓故于不墜頓入荒以遠攬紹千載之冥搜非政之以文治者乎鑑得參末坐幸推下流兼陸澄奪席之譽有何憲拙簞之恥不揆禱昧謹獻賦曰

伊古訓之將湮賴扶植於明良仿先民之講說立精舍之式臧得爽塏於遠渚遵秋水之一方旣鉏茅以築室復薙草而開堂遂蜿蜒以修弄疏洞達以啟窗允軒敞

而皓肝用瀏灑而傍徨貯美目以遠睇亦登樓而遙望
其樓也不廣不狹非麗何侈高堂崔巍飛宇爰啟藻梲
波譎芝栴雲詭陰蚪上負陽馬下止欂櫨相承欂櫨交
綺浮柱岵嶠以星縣文梁偃蹇以虹指扶欄翼張以烏
革天窗轆轤舉以遠峙循梯枕以徑度羌徘徊而上升旣
登降而周覽目愕眙而經營拖虹霓於欄楯列瑤光於
綺欄挹流霞之朝爽吸翠氣之清冷東則文瀾海流翰
墨之富金繩束筍勝囊錯繡向校農求鮒臧聃守名記
師春書垂史籀仲寶別其流孝緒糾其繆南則敷文峙
焉黨庠州序莘莘俎豆雍雍荀虞儼白抽黃禮洽儀具
蓊蓊士子命儔歡侶青衿懷其好音樂諧奏其振羽於

是昔冬涉春感物念時歸雁載軒新魚戲遲長楊檻臥
落華窗窺柅柅拂幕蓑蓑映帷簾雨晦卷棟雲陽飛綠
蔭穎擢紅蓮房披禽鳴上下嵐光霏微風定翠恬不可
殫知爾其朱屏曲折紅欄補綴方疏斜窗交幌對結紫
貝窗灰明螺鄣榻琴薦薰鑪沙版紅壁龍鱗之瓦齊排
蝦鬚之簾幾尺帳則坐鶴曾安牀則指邇旣設嵇叔夜
之鍛竈不妨陸魯望之茶鑪竝列其中陳以牙籤羅以
藤笥笙典珠囊琅函金櫃漢柏秦灰宗經毖緯卮說稗
官譚言奇字玉杯之書金鑾之志琴號食墨珠名記事
切綫割圖開山括地廣爲鈎沈窮極證墜多張華所莫
知率束哲所不計異諸舉而彌奇非虞初而足祕爰有

敦誨之彥山澤之臞始則土窟終焉石渠賣餅東海籀
桶上都氣窮數馬迹迂券驢家或等於握瑾智寧類於
盜珠非使然於利祿良有心以惠孚用私恥于蟲夏終
見謂于濫竽於是爭妍鬪險角韻分題尖叉互作競病
相齊壁牋刻燭落眉撚髭兀如木槁豁若冰漸脣吻鐘
調胸臆律吹分析肌理研覈是非莫不飛靡以弄巧吐
豔以炫奇亦有推十合一競今擯古法言幽求天規地
槩抗心千載任其所取澡身元淵宅德藝圃案六經而
校功眇古昔之緒餘甯越之勤不能過董生之篤不足
數指歲月而程效登斯樓以爰處若乃巒光乍霽湖氣
初晴酒旗歌板象管鵝笙珠喉轉澀銀甲彈輕游人空

國士女傾城鹿頭畫舫油壁香輪鶯花如海魚鳥爲鄰
盟鷗狎鷺戴月披星玫瑰滴露猩猩煮脣南都北里之
曲千秋萬歲之觥斯王孫之極樂非吾人之所寧而況
崔駟不樂吳質長愁繁欽之苔不埽馮衍之蠶乍收望
美人於天末獨舍睇於芳洲或竚月於西陸仰零露於
素秋恫長繩之不繫悟時敘之盡道率操觚而染翰懼
名實之不修願矢志於金石聊宣意乎斯樓

詩一

埽花山館集

余自幼耽吟詠散佚頗多然皆無足錄者茲鈔以著雍
潛灘之歲爲始屈步尋條烏知千里存之亦聊以自恕

云爾張鑑識

古詩五首

琢玉損其圭削竹毀其節我懷烈士心千載耿不滅
蕤發空山秋風吹菱絕自非歲寒姿誰能厲冰雪
崑崙嶧山陽上有梧桐樹幽人斲爲琴虛懷抱冰素俗
耳尙淫哇正聲失韶護中有太古音獨向空山晤
茗蘭生幽谷微風散芬芳佳人惜頽波甘心守空房秋
江舉芙蓉夕對明月光豈不懷陽舂勉施行露妨
世路趨繁華往往事微逐讀書非瘞貧厥言足三復朝
起坐晴窗一編媚幽獨長卿題柱人至今嗟齷齪
昔人重交游寶劍帶丘墓後世須黃金貧賤不相顧習

習谷風吹棄寘等行路千載贈綈袍橫涕有餘慕

猛虎行

猛虎猛虎大於兕前行山鬼後木客白晝公然入城市
西邨駝我胡髯羊北舍齧我白蹠豕少年縮手不敢視
嗟嗟猛虎我語汝黃顰白兔滿深山汝獨何爲至於此
汝獨不畏焦銅射石石飲羽楚有熊渠漢有李

勞薪集

予六歲失恃先府君年踰四十祇不肖一人愛之甚至
於讀書未嘗督過至二十受知於學使者朱文正公始
學爲詩明年館谿南劉氏臙琴山館遂得徧觀古今人
著作之緒頗識學問之方所得篇什亦略次第可攷故

編年之詩以勞薪爲始焉張鑑識

時大彬酒斗歌爲劉丈琨作

髯也昨置木瓜酒招我來觀古磁斗花陰捧過踰紀甌
云出前朝大彬手此斗胚胎極光怪非赭非紺非深黝
膩如桃皮削金錯堅若水蒼脫艾綬花梭船至失鮮妍
蕉葉釭開見老醜說陶前事不勝書尙憶卮言得八九
宣和以來貴磁器龍泉一出不脛走定州白與汝州紅
建安之窯挂人口有明祕製矜成化蟲魚花草無不有
世珍永樂薄如紙玉環嫌肥習相狃其外官哥汝閩豫
頗多窯變難矯揉銅胎鐵足亦苦心一種流傳定非偶
或言壺系出仙家辭太荒唐吾不取金沙寺僧無人知

龔春去後唯此叟指羸紋印雜款識小字娟娟篆科斗
趙莊山下石黃泥一具居然抵瓊玖銀槎碧山竹濮謙
能事由來有墨守不獨倂般合妙用剔紅填漆足垂後
風鐙過眼倏千年祇有人匪石金壽胡須粉麝壓香匳
那有刀圭誤藥臼三春典盡肅霜裘對此狂呼欲濡首
提梁卣倒百分空歸去車茵不辭歐

銅鼓歌

楂楂乳鵲鳴花尖主人睡起鉤疏簾竹鑪聲小打門急
如牛喘月來長尋沿階昇至一銅鼓苔斑未洗蝸涎黏
雲雷交互光黹黹荇藻剝落波濺濺耳蟬科斗手敢摸
年謫馬鼠脣先箝豈有生沙與活翠雨淋日炙知相兼

粵有谿崗有都老珍踰珠玉難窺覘覘覘觥觥千頭換未易
高會臚列中心快畫衣蠻女髻一尺扣以釵腳開香匳
木縣花紅酒初熟馬肝羊胃羣喁噉有時鼓聲澀不起
鷹眼四射梟音訥白馬祠前霧昏黑綠郎廟外雲蒼黔
刀橫箭直力如虎三摻不竭師寧燼此鼓浮沈浩灰劫
誰扛千里歸茅檐昔日將軍建銅柱交趾充貢咸嬉恬
魯班門邊式金馬曾銷萬面寧敢譖古人一事寓經濟
小儒不識舌互譖太元三年下丹詔膏肓大吏加鍼砭
輦錢入獠充鼓鑄行若駟僧奚能廉於今害銅興江左
鵝眼盈篋憂心悵算除金器更匱鏡刻泥濫用宜髡鉗
矧復擊時亂雅樂詩筒寧便矜郵籤昨聞

朝報禁赤仄會碎此鼓投炎炎

李白樓招集湖舫分賦

平波漾鱗紋艣枝曳搖碧白也折簡招舊雨紛如鯽是
時候秋中湖目尙堪摘遙峰露娉婷髡柳傲蕭緘淡陰
漸解駁日腳漏孺格微雨忽過來煩襟此焉釋輟懼復
容裔亭館弔陳迹偶然探三車終令皮雙屐矧領漁隱
銜夙心託汎宅回船出葑田結飯蘋洲夕鬪拇與藏鉤
蟬聯語無擇小戶羞歐茵洪飲方一石暝色赴漁鐙梵
韻催歸客羊劉罰不任索句免頭責勝引忘朝昏妙侶
感今昔燕朋吾敢搜澄懷在三益

桂蕊

秋風策策雨絲絲一縷香生桂樹枝飛燕釵橫金粟裊
水蒼佩冷玉犀垂卽教小住寧無意欲寄長謠定未遲
不待月圓花滿後畫欄先已立多時

姚笙華以水仙花見貽賦謝

點染春風欲化煙玉羅窗下畫簾前山礬開後應休妬
總與梅花有舊緣

夢來無處說生涯小字猶爭萼綠華長恨試鐙風裏看
璫璫錯認馬塍家

簾衣風起漾情瀾也抱冬心凍不乾髣髴青谿雙鬢影
細腰初試息肌丸

湖樓集

庚辛之交予以試事往來於西子湖頭者不下二十餘
月往往借僧樓爲行窩鬪韻語於花龕寫騷懷於秋艇
疥壁留題遺失不少彙而錄之并爲一集張鑑漫書

汪氏雙節詩

鬱鬱青松樹上纏雙兔絲霜風一以吹折此孤生枝同
居兩貞女種槩北堂垂沒爲長不歸門戶安可持堂上
白髮姑屋下烏兒兒織縑日盈匹辛苦當告誰鬻我身
上衣爲姑作夕糜脫我耳邊珠爲兒起晨炊兒飢學且
廢姑飢孝還虧二者一不得羞與黃泉期食蓼二十載
神明無所欺古井自不波訓狐焉能爲奚必磨笄人方
可光門楣吉金與貞石要使綱常維送姑歸泉臺促兒

向京師歐血日一斗苦節難爲辭小婦報地下大婦力
亦衰惟有桓山鳥至今猶烏私別鵠羽翮鍛孤鸞鳴聲
悲誰將寡女絲彈入清商詞

夕陽八首

林梢渲染有無閒髣髴烏衣巷口還看盡鶯花三月樹
愁生金粉六朝山碧雲作意遲來友暝色催人上別顏
記得紅衫高骨馬九峻寒影繞潼關

拋殘宮綫泥商量添得分陰上螭牆遺道似傷垂老別
清歌重惜少年場韉紋水胷明霞亂卵色天烘積翠涼
曾向茴香花畔坐玉貓眠地晝初長

瞳隴猶認照高臺難繫長繩一任頽滿地落花春畢靜

半天涼葉鳥飛回，秋千架冷迷行板。
苜蓿盤空，罷舉杯，便到采桑南陌。
上使君五馬，總心灰。

搖曳簾波一桁低，纖雲四卷又平西。
霜欺柿葉，明高閣，柳壓樓鴉，閃大隄。
蓮漏聲沈，香院靜，繡幃影偃，石壇齊。
不須較量花，甄裏爲有葵心，不自迷。

半規曉影照花枝，步屨林垆有所思。
壞道殘碑，烘石墨，四圍濃翠，亂鞭絲。
誰家鬪草歸，偏晚幾度尋詩，去較遲。
欲向碧翁重搔首，年華銀箭水同移。

平沙一抹淡無言，照入駝峰帶綠垣。
荒磧馬歸弓影直，軍門旗卓繡紋翻。
抱來牧犢迷莎草，移上征袍見淚痕。
莫道傷春兼中酒，閒愁無限近黃昏。

銅鉦低挂遠山橫散作樓頭玉笛聲鸚鵡畫長閒話少
鷓鴣天迴暮雲平歌停北里人將別火入荒陵雨又晴
幾處蒼然眺平楚也應腸斷沈初明

望中雲葉半模黏閱盡繁華是素烏曝袴不嫌聊復爾
揮戈那得住須臾綺羅易散哀蟬喝花草無情夢蜨孤
豈有鸞坡描日筆獨將金甌畫平蕪

題張晴崖畫扇

紅蕩花香水不波絲絲楊柳覆晴莎多情誰似張三影
又載兜娘水上歌

台歡蘭圖

重簾香度午森森接葉交柯態不任對影已教成巧笑

多情無奈是同心
藥名獨活長年訣
桐號孤生太始音
持較此花渾不似
祇宜添上美人簪

題方湛崖春郊試馬圖

珊瑚韉拂綠楊絲
花底連錢小試時
但得功名式銅馬
歸來款段不妨遲

十年騎向

鳳城西不遇孫陽
首重低今日春郊
還洗刷知伊深惜
錦韉泥

謁南鎮四十韻

越部留名鎮周官
記職方秩宗尊異
代典禮肅今
王山澤靈應效風
雷饗必償幽崖通
瀚渤絕壁入青蒼

雨勢驚磅礴雲陰接混茫氣還蒸大澤景欲蔽南荒玉
帛塗山遣春秋禹澤長百靈羣拱揖千帝儼迴翔報本
由來重祈年自昔彰深巖藏玉冊古洞冷金牀相古流
方割惟斯物乃康地名聞會計封爵數開皇嶽瀆尊應
視金絲樂未央永興存福祚昭德叶休祥苔蘚穹碑在
丹青闕殿涼繡旂紛窈窕畫壁補荒唐鸞御來朝夕蚪
騶下雨暘陰廊窺鳥鼠寶座列冠裳厯世欽猶舊祠官
祝每莊檜枝垂寢幄芝草長齋房鐙火應還展几筵洵
屢將麗牲嚴繭栗醢酒酌椒漿蠻管隨時得神弦未可
詳羣情歡士女祈望信烝嘗國計時無沴民依歲不穰
金甌調水旱玉燭順陰陽瞻拜心彌肅周觀志或偃甕

年方皞皞夏旬自芒芒

帝語垂綸綽謨言協贊襄平成看

聖代變理本明堂惡浪支祈鎖開山木彪禳雙圭分日
月九鼎象文章作貢南金美徵材竹箭良覲期分輯瑞
禮數肅鳴鏑執事嚴升贊迎神記太常入門昭儼恪弔
古轉傍惶甘露零南土朱英滿帝鄉妥靈陳黼帳肅祀
其瑤光宛委晴雲白蒼梧暮日黃六陵何處是明德在
馨香

後奉華堂研歌

古今研說不自同羽陽已去香姜空澄泥之研出何處
令我一歌猶未終憶昔天水南渡日鳳皇山下樓臺出

紅霞帔屬大劉妃妙選纖腰初第一調鉛殺粉無日無
繪事流傳補袞圖桐華煙墨磁藍紙研也想亦隨歡娛
芙蓉岡西射廳北弦索高張簾影黑此時承詔拂絹素
玉奴翠奴少顏色我聞德壽日寫經一百九研同繁星
采來寧向洮河綠琢出渾似端谿青御史文成那得賜
當時爲進婉容位君王留此不肯歸此語何關妃子事
玉函零落冬青前百年纔過漂鈿蟬石湖靈壁不足數
海嶽蟾蜍豈足傳髣髴厓山陣雲苦玉帶生亡事何補
獨有黃冠汪水雲手把斧柯淚如雨摩挲未畢心煩紆
重之不踰紅珊瑚眉紋乍想土花蝕星點還疑螺黛汗
紅雲杳杳秋風裏名姓空勞鈔畫史匣邊漫展玉鴉叉

冬乙一
一樣銷魂楊妹子

文瀾閣閱書紀事四十韻

東壁圖書聚西湖節物和然糠仍不足懷餅許相過地
比鴻都近人非虎觀多入門繁竹樹繞徑雜藤蘿青瑣
窺神女文槐植素荷陰蚪還負槐陽馬總承阿著錄窮
千古搜羅準四科琅函詒典籍藜火費編摩王儉讐非
略劉歆校不譌琅嬛何窈窕宛委正陂陀憶昔遷明社
中原值倒戈曲中歌白雁水上起蒼鵝金策操誰是珠
囊理則那縹緲淪突豕帷蓋亂飛蛾一自沈榛杞奚能
返馭娑王風從此缺大義不無頗

聖德同三代平成邁九歌武功傳息馬文治浹靈龜遂

降求書詔從回日下河陳農方奉使苗發更奔波別錄
牙籤富中經鈿軸羅東西曹抗抗大小西峨峨載白盈
鈴轂裝寧數駱駝五車時檢閱七閣日摩挲蓮炬分同
院花甌認舊坡殿頭傳珥筆柳外聽鳴珂曾鞏書曾讀
洪昇刻其哦文林歸

帝鏡義海得龍梭典制

熙朝美津梁後代哦自應徵鳳翽那不育菁莪伊我懷
丹槩終年住澗蘊倉憐曹汙漫園等兔么麼繡虎才奚
似雕蟲技若何時真憐婉晚意每惜蹉跎脈望神徒竦
金根謬屢訶何緣藥寒餓遂得發沈疴海難爲蠡尋
條可得柯撫心殊落拓此事恐媿嬰竹屋鐙空擁茅檐

凍又呵他時能縱日桑硯與重磨

稽谿拾橡集

辛酉春正月予膺志局之薦至武林雪後舉主諸城劉
信芳師招入使院時將按試台州遂偕予爲石梁之游
感知己之難逢喜良游之未晏竹兜烏榜卽事成詩歸
途錄於山陰會稽之紅船二月下旬張鑑識

風雪渡錢塘

聽罷秋潮又一年鳳山門外水黏天無端虐雪糝風裏
還上西興驛口船

敲鯨輕車簸兩輪半從煙水上江潛臨流且莫矜天塹
牛角山河久劫塵

漏舟一曲竟如何南渡行朝本不多莫以沙蟲憐四鎮
魯陽曾向此揮戈

偶感魯監國及張蒼水諸公
事前明黃梨洲有行朝錄

斑竹

疏煙破晚晴參覃見寒木何年負苓人此中結茅屋仙
侶不可逢復向山中宿歸雲沒遙岑春星帶蒼麓僕夫
知我煩酌我一杯麴陶陶臥繩牀短夢落空谷擁被寒
松颯敲枕響巖瀑隔籬號晨雞喬林亂飛鵬草草理行
裝罷噉防風粥取徑望前岡濃嵐墮深竹

會墅嶺

春岫如美人林梢露斜領窈窕雙眉痕娉婷雨鬢影莽
莽走西南煙巒越修整籃輿喜初晴四圍軸軒屏丹梯

一兩盤側足不敢騁巖空春雪寒雲暖海日永天風激
激吹彌覺衣裳冷山人掘朮回門前落紅杏始知春雨
深竹桁曬笊簞安得囊羣書此中悅清靜

楊柳河

巍巍天姥峰遙隔楊柳河山勢始一東積鐵蒼穹摩或
如魚出汕或若蜂黏窠或點似絳跗或堆同青螺仰視
迫怵惕下走行陂陀三復垂堂言失腳理則那幾折乃
出谷歷亂明沙坡涓涓春泉響好鳥鳴高柯夙聞丹沙
井欲訪愁嬋嬋邈想風中琴泠泠出巖阿

清涼寺

管然楞伽山乃有清涼寺頭陀爲開林閒房敞空翠入

門禮金仙沿巖讀梵字花燭滿諸天禪誦悅清閣窗前
柿葉堆屋後竹光媚食柏廡羣鳴銜花雀深墜始覺風
幡空妙諦參不二鵲影怖大千何時徇猛鷲山僧禪味
美伊蒲更羅致石壇不可留遙遙入松吹

石梁觀瀑

山山佛頭青水水僧眼碧今朝天台游果造梵王宅禪
關兩衲子引我拜奇石春瀑不可駐飛流破幽壁晴雷
激眾響秋濤卷孤白天笠銀潢傾地軸龍門折始信陽
冰凝夏蟲苦頭責平生山水懷能著幾兩屐歸來腰腳
疲茗啜臥瑤席時有碧桃花繽紛落仙液

中方廣藏經樓觀梵書遂宿樓下

夙願喜內典有若嗜瘡痂龍藏苦未窺雲笈空紛拏茲
來山水窟每到佛子家熊熊遠公龕金繩弢三車古樹
蔭貝多幽禽唳頻伽蓮鐙一以吹照見恒河沙觀畢復
作禮面壁相吁嗟須臾兩荷葉遠近喧寒鴉開軒睇煙
岫歷歷明晨霞惟有金粟影無言雙趺跏

望華頂不得上

高人拜經臺乃在華頂上中有列仙都遠接蓬萊仗白
鹿飯松花青鸞隱蘿幃定知洪崖子雲氣通雁宕吾行
阻程期登高每惆悵振策鳴天風決背入崩浪始覺象
緯空轉缺平楚曠欲劉猛虎吟敵彼小海唱雖乏濟勝
資躋足一神王東嶺復回車長謠信瞻望

高明寺

五日行深麓四度逢精廬高明枕澗戶三面圍竦然清
磬考隔雲涼風盪華裾感此水田衲香積烹春蔬麤糲
亦足飽煖食復何如佛子前致辭上客且安居單引阻
場竈飛輓艱柴車青銅百錢強熬波一斗餘乃識府海
處亦有窮鹽魚和南謝山僧吾將告簿書

真覺寺

今朝風日清煙散晴杲杲崩崖竹無垠山腳正迴抱盤
盤千巖中精藍恣幽討頽垣半補蘿細徑盡埋草老僧
茶色褐淡食面枯槁石龜伽藍敲瓦鼎旃檀少佛幢記
阿婆妙義讀難了髣髴智者居禪寂此悟道應歎百年

中未辦青精稻含睇雙浮圖雲端自娟好

天台縣

垂楊作微黃赤土積芳甸一掩復一重峰迴接仙縣雲
孤低不飛谿清轉如綫敢矜兩股輕暫息雙目眴卯市
山店深狼籍畫眉見紫筍抽山腰濁酒滿缸面爲感年
華流春風坐將變吹鐙解煩襟濯足臥深院遺憶洞中
人驚紅集輕霰豈無句漏砂膠鸞學脩煉

雨縵帖

巨嶂若銜邇亂石紛鉤連鸛鶴忽飛起漾入梨花煙暖
雲緩溶溶香雪明娟娟山家苦心計畊作無桑田抱犢
逐鮮草籠鵝隨新泉峨峨茶園嶺松生橫其巔我本學

秦餘種樹西塞前結網罟爲理插斷葦新編今宵台州
城曲尺還安眠桃花足春水夢落漁榔船

入疊嶺

到海僅百里陟巘仍千章滴瀝嵐翠溼彎環谿流長我
來入疊嶺曲折屏風張居人編竹簾篋簍包餽糧撐拄
亂眾水邪許回穹蒼感今語局促懷古心微茫緬昔鄭
廣文偃蹇歸遐方鸞關一以鍛驥足難爲償詎無埋照
晦徒增濁醪傷貯情望木末晴雲白豪光

過江集

辛酉秋余以選科將赴

朝考舉主劉信芳師挈以計偕時瘡疾始愈青袍遠養

襪被登程高堂促行瘦骨欲絕余生平未曾過江過江
此其始因都爲一集曰過江張鑑識

游甘露寺

阻風京口江緬昔甘露寺取徑伐荻人殘陽落寒翠鐵
塔撼濤頭丹梯隱松吹浩浩地軸寬颼颼耳根異樹黑
老鶻鳴潭深毒龍睡頗聞稗官言苦少石墨記云是海
嶽庵鉏茅此開薤一朝換研山至今仰高致所願治隱
淪對此不能置安得玉蟾蜍重來換斯地

張秋鎮

轉粟東南遠儲胥自此供市樓明薤堞荒驛冷霜鐘時
祕驚秋汎流亡慘病容登來纔一月蕭瑟似嚴冬

通州對月

通州城下月遙夜滿寒林爲客多鄉思離居識此心
廊空聞馬語戍古入笳吟尙有垂楊樹攀條不可任

爲石庵先生題趙孟頫松谿覓句圖二首

讀畫哦詩歲月遒東華門外又句留何緣展向清明日
忽憶蒼茫印渚遊

錦囊到處有新詩謾謾松風拂面吹卻笑當初陳正字
擁衾研墨閉門時

讀吳梅邨集和石庵相國韻

江左降旗逝水流遺聞零落倩誰收阿龍殘客平生感
閣部彈文異代愁舊苑笙歌銅狄淚故宮煙樹掖門秋

蘭成腸斷江南賦垂死吟魂更一留

捕蝗謠

去年桑乾沒頭水九十九沽船入市今年春收幾分熟
蝗蝻飛來齧田菽東家西家齊捕蝗道旁流民尸半僵
彎彎環環向前拾雙眼將枯不成泣明春雖發海陵倉
羸老何由轉鄉邑溝中捐瘠誠可憐斛米夜報輸軍前

望雲集

壬戌秋七月就試都下予初名在二等旣而復試於
保和殿予卷落二字被黜放還舉主諸城師留予住太
學鑑以親老辭遂決意南旋迨歸里門而倚閭之望已
久題曰望雲以此志也張鑑識

清海縣

浮雲連朔漠急雨灑燕天荒縣留何代哀鴻集舊年
棗林圍稅促驢券客愁牽予亦東游倦南歸意渺然

交河縣

昔日交河驛清時斷戍煙黃流爭海甸秋草徧原田
地闊晴盤馬天低暮急蟬薊門猶未遠側首亂雲前

宿蔡莊

缺月帶棗林舟子望蔣渚倦鳥趨喬柯蹇驢入門里
燕地苦早寒已有抱瓜女舍船升崇工幾折會通水輓粟
勞古人疏鑿此閒始方艚蔽空江撐拄亂清泚海運肇
伯顏千斛或可止北毳興南金徒然飽姦宄三復竹垞

詩頽陽翳遙紫沙路上暝煙谿禽一飛起

東阿道中

齊道東南遠乘流破曉煙人歸芳草後水落暮秋前
飢鳥窺園果畊牛臥蔣田此閒曾牧馬經濟邈先賢

冬青庠集

壬戌冬十月予自京師還里吳興太守許公

祖武承撫

軍儀徵阮芸臺師命促予入署家園定省裁及浹旬不
得已爲飢飮所迫遂至武林節院寓榻前有女貞一本
結實叢茂花時香雪如茵卽南宋宮中所稱萬年枝一
名冬青樹因以扁予庠焉十一月下泮張鑑識

漢王禁銅印歌

漢書元后父名禁字稚君

月精五鹿漢祚徂張永銅璧紛貞符陰爲陽雄水火殊
六百四十期不渝爰誕聖女姪從姑禁乃莽祖貌生羆
刑名學成吏羣趨腰纏私印用自娛生沙剝落活翠枯
中蟠兩字深可慕持刀立旆形相扶參錯史籀糾珊瑚
阿誰漉井搜離朱易之豈惜千青蚨稚君舊事班史俱
摩沙十指心煩紆五侯同日耀通塗煌煌敵敵金印鑪
未央宮中鳴笙竽老姦置醢稱歡愉投壘詎天羞區區
欲與俱葬何其愚君印臣印徒嗟吁爬剔跟肘忘飢飭
想窮法律操譎觚廷尉姓名播兩都有時掉棄如索逋
好酒及色無時無甘露五鳳同隙駒一跌赤族輸荻蘆

吉金闕人朝復晡主角完美兼廉隅漢書侑竚例髯蘇
對之直足傾百壺吟成交付平頭奴檐角冬青曉鵲鴣
題德清徐孝婦割股圖

北風吹女貞啞啞嘯寒禽孝婦起中夜感此勞寸心尊
舅忽不樂緩和爲沈吟旣乏九節菖兼少千歲蓂唯有
臂上肉一七踰南金薄俗貴苟免伐性如勿欽宏演古
義士納肝遺好音忠孝本一致況乃匪纓簪蒼弁自言
高清霽自言深誰將履霜操譜入朱絲琴

題歲暮歸省圖爲林小桐賦

霜花獵獵歲將暮有客治裝指歸路手持素紙冰雪紋
邀我爲圖賦長句我詩我畫非所宜感君鄭重不忍辭

一朝殺雞客曾見千里齧指人誰知登堂入室春醱熟
萬樹梅花香繞屋獻壽梁鴻對舉盤開筵潘岳親扶轂
秋來我返長安居老父七十頗有餘春暉草心那可道
飢來驅去辭蓬廬還君此圖三歎息屋角慈鴉語昏黑
莫笑浮雲總莫歸鐙前淚漬萊衣溼

常山太守印歌

苔花不蝕常山字慘澹如披天寶記潼關已開河北亡
青螺西行替戾岡羽書夜鈴金印裂舌血一噴名不滅
龜鈕省識興元年漢銅司馬徒鑿鐫濃綠著手手生澀
精靈入箱鬼母立秋風夜戰忠魂泣

眞州眺冶山書感

曉入長蘆寺高眺眞州山云有大小銅升鑿西漢閒瓦
梁旣窈窕迎鑾復彎環老漣卽山鑄往往藏其姦遠與
權郎埒亂彼九府圖一朝及猛燂厥罰非千鍰害銅害
豈弭辱金辱可患乃知富者溢不若貧者慳浩歌淚盈
把夕日茱萸灣唯有瓜步水終古流潺湲

送許楚生歸揚州

舊年我自燕臺歸廣陵城邊秋滿衣今年君復渡江去
迎鑾鎮前落花暮流鶯恰恰嬌春風到門正及櫻桃紅
讀書未要功名早萬事不如歸去好天涯何苦愁芳草
日暖淮南四月初枚臯里畔昔時廬年來同作蘇門客
且著秦觀一卷書

題查士標畫

雨洗秋山高濃華夜來歇獨有紫芝翁巖居飽薇蕨一
詠滄浪詩寒流入超忽

吳江道中

楓葉吳江道孤篷細雨通人家苦春水魚鱗足秋風卵
塔窺波白藤花倚堞紅近來歸太僕何以利吳中

江陰縣

八月江陰縣天寒越葛輕民生菰米熟冬計木棉成霜
隼晴欺塔秋潮夜偏城君山渾咫尺想像海雲明

歲暮歸舟

北風棱棱霜氣清獨客曉發餘杭城梅花未開作珠蚌

青山笑倒船頭橫
犇波南北已十載
春來冬去何所成
宵長沙雁作爾汝
白髮盡向愁邊生
盤中苦酒玉練白
匣裏短劍蒼龍聲
賈生射策志不就
馬周籌世心難平
曉星滅沒急早起
柴門知有兒童迎
弓張帆腹頗快意
不獨雲散開朝晴
短衣射虎獨漉歎
煖湯濯足彭衙行
幾時卻種水田秫
不愁歲月空崢嶸

勘書後偶城

校書日亭午一雨春風別游蜂作潮聲滿地冬青雪

吳烈婦詩

鬱鬱澗底松青青原上草卉木有本性陵谷不自保
嫁文作門楣雞狗亦得將良人一以萎此命焉得長
清晨

拜牀垂上堂別親串嚴霜既夏零何用涉憂患
時襦脫我頭上經君舅勿復言死則爲同穴破鏡亦不
磨古井亦不深南山白石爛不滅烈女心

關山行旅圖爲正郢蘭索賦

老倦班生筆徒驚歲月沈雲山遲發興雨雪記登臨萬
里乘查願千秋破浪心看君策高足中夜動長吟

東藏寺楸子樹歌爲竺峰上人賦

禪堂楸樹誰所植輪囷欲過海西域雲棲老納背手栽
行腳攜來年月失心空百斛青茸茸兩榦決起淩霜風
白蝙蝠飛秋月黑黃鸝鷯叫春雨濃根到九泉無曲處
壽與金仙相爾汝珠胎一結一佛號拾賸僧雛付烏鼠

此衲本是儒家流織簾之苗耽清修三年苦行影入壁
有姓翻爲官人羞萬歷中浙諸紳士爲沈蓮池請封禪
師內決鄭妃此日姓尙未除何得云
禪不允事見耳譚 青牛西引別關吏枝葉猶留後世記幾時來
傍贊公房盡掃名根息塵累攤經煮藥樹陰開祁孔賓
且歸去來梓桐枯柏松桂下視凡木同蒿萊

蕪城集

予素無一壠之植而家逾入口硯田之入偶有不繼輒
罄罄終歲乙丑秋仲之至廣陵也仲宣依人曼倩索米
有不得已於中者而平山堂下之清明已漫一年矣丙
寅三月張鑑識於揚州舊城牛豕巷阮氏之文選樓下

梅花嶺謁史閣部祠

閣部祠堂在秋原落日黃全家留愛將殘局覆屏王朱
鳥采恩下青菁最負荒南天有逸史憑眺淚沾裳

華頂觀雲圖歌爲李白樓索賦

白也昨向檣谿歸手提障子剛四尺自言身挂綠玉杖
鳥道盤空過桐柏臞僧煮飯雲生時晴天莽莽風絲絲
清涼寺邊止一縷山腹已似鱗之而一朵墜地一朵起
前者崩濤後驚兇兩人風母根柢空倒卷瓊田入海水
石梁脊冷吹天風下視一氣龍所宮餠餌急出破甌底
騏驎亂蹋鹽池東天胎一萬八千丈呼吸遠接仙人掌
須臾一掃雲母空萬里山光入疏宕昔年看瀑上赤城
咫尺不向華頂行仙娃笑人眼福薄安得騎鶴吹鵝笙

安得騎鶴吹鵝笙卷圖素壁還送君山童黃梁且漫熟
被絮蒙頭夢白雲

過明顧侯墓

白楊蕭蕭入秋雨墓門老鴟作鬼語廣陵城南燐火青
翁仲無言別寒楚行人能說故侯家故侯當日鳴金笳
會稽姑蔑青龍罕親奪單于白鼻騮羣雄割據眞蛾子
破敵歸來九重美須眉已畫南薰壁功業還歸柱下史
紛紛甲第起連雲鐵券丹書事總聞新昌里接鸞簫隊
履道坊成鶴蓋羣可憐一旦輜車杳漆火熒熒秋夜曉
銀蠶朝閉芻靈空粉字春寒丹旆小小侯五姓朱輪馳
萬歷年間尙足思一垂故國銅仙淚此墓淒涼不可知

誰知十萬防河卒欲輓軍儲利吳越朝掘墳頭未到棺
暮捐墳根已摧骨子孫雖存那可收黃金摸盡作寒湫
祇將題湊分同穴獨抱殘碑哭九秋吾師家居惜文字
步屨秋原客同至開平舊是灌蔬丁邵陵誰識種瓜地
柴門無人秋草紅七十老翁前鞠躬疥壁隱文瘞甑出
殘礎留碣龜趺空以帚來埽字明滅鈐山堂文一披閱
苔文不蝕蕩寇勳蝸涎欲沒征南伐清門爲庶凡幾年
秋蟀春鷓傍冢眠清明麥飯枯體泣社日蘭盆木客憐
旂常舊業今已矣七葉金貂西逝水有子徒歸廝養家
生男半入屠沽市同人問訊重淒迷漏火尋羊理亦齊
君不見雨花巖畔瓦官閣松柏摧殘石馬嘶

中秋後一日宿曲江亭待月不得

一宿江亭有所思
鷺濤聲上海門遲
徒傳居士能爲賦
始識錢唐誤入詩
風葉半天涼似雨
露蜚八月細於絲
今宵欲共秋蟾約
弦管無憑未解吹

後冬青庠集

雲臺中丞之再撫兩浙也實於戊辰三月鑑時持默齋
府君之服未滿明年正月屆禫乃始訂其有韻之語先
後雜次未敢忘啁嘲之痛也張鑑識

西湖話別第二圖爲朱職方同年某堂作

五年湖上負嬉春
錄別花前恨轉新
芳草似知遊子嬾
東風偏與故人親
千秋事業成須早
一卷丹鉛誤已頻

此去相思重搔首金臺曉日隔黃塵

題揚州江氏兄弟怡怡圖

卅年姜被讀書雞尺布聲高意轉迷誰向江南尋二陸
白頭風雨屋東西

廣陵耆舊久淒涼把卷花陰日正長想見惠連殘夢破
一池春草在西堂

韋家花樹謝家詩除卻眉山總不知偏有卯君佳子弟
百年重訂脊令詞

題友人更生圖

鴨頭欲綠春雨乾封雲千尺回晴瀾藏鴉門外喚搖碧
槩牙呿啞窮追攀揭來詩翁一蹉跌有若峻阪流銅丸

水府之官敢邀致待波怪物飛驚湍須臾卻立出水底
寒蛟脫臂鴻漸磐眼花落井豈其例蘇潭月上方團圞
吟成束笥肯送似披圖彷彿零丁看他時校書署七略
一笑臣向何寒酸

題奚鐵生雪泉圖

積素耿孤岑澗戶瀑初凍何許薛蘿人開軒獨尋諷初
疑藍田莊蕉樹或不種歲寒同此期并作梁谿夢一詠
青苔篇雲繁鶴聲重

爲陳桂堂太守畫五十學書圖并題五絕

頻年東抹又西塗自笑縣槌十指羸偏有中條山下筆
爲公重譜學書圖

那能學畫更同書
斂盡薑芽兩不如
舉似先生渾一笑
未消分與百車渠

六草三真總軼羣
閒來揮翰落煙雲
有誰解與松紋紙
絕似羊欣白練裙

董張家法擅當時
可要文清作本師
彷彿東華門外住

巖風斜日見臨池

予辛酉至京主石庵相國家每五六日相國輒置酒邀予視書須臾數十

紙揮灑略盡

五年相見鬢成星
曾寫山陰道士經
若得分將三兩卷
此圖聊當賺蘭亭

題楊小亭蕉窗讀畫圖

關西風調世應孤
暇日能爲翰墨娛
種得蕉如懷素宅

冬乙一
藏來畫滿長康廚晴天瀑後看嫌少雨夜聽殘論亦殊
徑欲破除塵網盡相從勝作列仙臞

冬青館乙集卷一

冬青館乙集卷二

烏程張鑑秋水

詩二

北征集

己巳秋鑑隨芸臺師星輶北上車中擁被微吟暮宿荒
坵於土炕上索老瓦盆磨墨汁記之語無倫次棄去久
矣明年春日稍和尋檢舊簞輒過而存之亦做帚之意
云爾因附以京師所得共若干首都爲一集庚午正月
十九日張鑑記於京師宣武門內太僕寺街之衍聖公
舊邸

飢鶴歎

舟次毘陵鄰舟有籠雙鶴將以貢 上方者
感而賦此

仙人騎驥生青田養成丹頂將千年山中歲晏芝草爛
網羅隕折繁霜天羽毛翦鍛樊籠閉搖翮終日思淩煙
那無蝦魚足晚食何有杉檜供晨眠舊侶半失沃洲寺
靈匹豈約黃櫨泉我生感此再三歎舟人肯爲停酒船
借問買此何所用將貢天府值萬錢回頭語鶴莫惆悵
此行乘軒非無緣鶴聞轉目對以臆感君情義相周旋
石壇白樂松蠹美

禁藥豈慕官庖羶君不見千年華表令威歎有銘寧勒
焦山巔

過揚州見江鄭堂

潘

飛觥握槩氣如虹卅載吳門作寓公金石滿牀長手拓
圖書萬卷應身通九師說易讐王弼四座留賓學孔融
我媿盧仝君馬異結交聊見古人風

訪姚殿撰秋農先生

久思虞祕監相見竹西亭才自高春榜名先在
柳屏奇文辨蒼雅新著富圖經應有石渠論當求永夜
聽

過邵伯有懷焦理堂

經年不見劉文學著作荒江閉講堂說禮定超鉤命訣
割圓從演借根方宦游鄭穆寒氈在

謂汪廣
文萊

病目張湛

宿草荒

謂凌進
士廷堪

何日樊梁湖上櫂煮魚剝蟹共徜徉

高郵

秦郵才百里已失露筋祠暮雨葵花瘦秋雲鷺鳥窺城
空孟勢見隄遠綫形支欲問防河使頻年幾費思

二十三日自寶應坐肩輿至淮安

己巳斗插酉東裝將北游清淮決白馬洪濤絕邗溝箕
風揚其沙乃舍汜光舟筇將涉修阪晴日明雙眸烏犍
出遠甸白鷺鳴芳洲高粱穗搖曳蕎麥花紛稠瑟然草
木落正作淮南秋隄高見鳥背浪急濺屋頭淮強河愈
強誰辦洪澤憂薄暝投逆旅捫揣連更籌仰看天軸側
西沒低女牛風色屆授衣役車安可休不眠先鳥起涼

蛩聲啾啾寄語同袍人努力勸前修

自淮安至清江渡河

褰裳登大隄高眺桐柏水一石三斗泥誰云足清泚巨
浪急鼉奔回湍颿驚止屏息出長年動色若灰死飯畢
上籃輿沿波探水理南埭北乃漲實與海疊似眉埽將
東箱柴盤必西峙我聞滾塗法其妙實一揆子輿善觀
瀾無事智之始落日風塵昏遂達清江渙隄仄勢建瓴
爲魚懼屢徙洪濤鑿呂梁未識中流砥片帆亂黃流浩
浩波益詭悲哉神禹功敢告防河士

崔鎮

茆店行益早結束未辨色羸羸飽吾腸出門看北極天

船已西傾參旗漸東側荒雞鳴膠膠沙樹徑轉黑殘夢
續車輪團團照初日穉犢出廣場高雄下叢棘曲沼潏
寒湫磽畦穫新秬果蓏告有年甘苦齊結實小市足來
牟原民識粳粟林垌曠以遠人物古而質誰爲下相人
復此鍾吾國仁憶吹簫儔寒原氣蕭瑟濡軌濟淺流馬
行初及膝時逢枳殼林知是淮南橘

泰安府

揭來羊流沾徂徠控其左亢父在何許蒼蒼但峨峨漱
馬凌晨霞卓午再炙輶瓜架尙斑斕棗葉漸頽墮居毗
爭種梨山婦習騎馬遙望太岱巔巖巖出平野封石漢
代留天書宋時假七十二禪君神茅說儒者作宗自古

初分嶽戟典雅嵐氣徧羣神靈爽颯中夏盤盤三門高
泱泱五汶瀉我思日觀峰行程不我可回駕謝山靈黃
塵沒雨蹠繩牀聊復安疲壯亦當房

謁岱廟

靈威仰帝颯高寒到此真成眼界寬上古春巡曾瑞輯
千秋東禪幾封乾石壇古柏來風雨畫壁羣神奉敦盤
安得飛輪淩日觀看回曦馭不辭難

自官橋至三家站

清曉發雄關北風吹馬耳木葉浩然脫荒雞鳴不已芝
廬越白溝洪波流瀾瀾憶昔慶歷初金遼實胥齒醜釁
海上盟爭桑從此始燕雲十六州如礪奚足喜拓地本

難耕割城亦廢壘徒增歲幣輸不掩南渡恥至今土炕
邊只堪牧雞豕茅莖生蹶泔啄木下園柿金笳當晨吹
蘆管遠戍起晚秋已早寒結衣僵十指何處聞和戎攬
轡石湖氏遙遙天水年如讀靖康史

題石亭遺照爲吳梅梁同年賦

柯亭風月本清嚴誰復聲名比吏廉看取門前數株柳
臨谿拂水似陶潛

鑑湖春日曉蒼蒼無數山陰覆石牀想見諸孫讀書處
蕭疏留得舊青楊

爲馮茂才永清題蝴蝶畫障

謝家詩句我曾知祇在梨花柳絮時應是香濃飛不出

素衣從此化爲緇

殘香緊抱恣春游不關花街與酒樓說與蜻蜓渾未解
任渠飛上玉搔頭

東風吹處舞成團莫遣京華客裏看一夜鄉心隨夢去
碧澗堂外杏花殘

題趙忠毅公手書詩卷後

嘉廟同文獄誰憐高邑心書名魁點將講學繼東林一
疏神羊伏千秋味槩吟阜雕方畧正委鬼復僉王甘露
奇謀洩紅丸禍本深左楊五虎盡周繆六芝沈感激留
詩卷流離戍隴陰寸丹孤太白殘素匹南金舊史宮鄰
失龍蛇墨瀋尋蒼涼如意舞霜氣入華簪

信芳師以扇索畫卽呈

游仙曾記到樵谿
躑躅花開草未齊
十載光陰同一映
春風吹夢石梁西

花宮桐柏雨冥冥
到處仙巖佛髻青
安得洪厓除玉詔
重騎白鳳叩雲扃

歐門恩誼重依依
來本無心去亦非
畢竟畫成還自笑
釣師何日著紅衣

南游集

庚午秋九月吳縣潘芝軒師奉

命視學西江鑑隨侍至豫章寒原蕭瑟雲水參寥偶有
所觸抒其抑塞工拙都不計也時十一月十有二日張

鑑春治甫書於南昌學署之多識前言往行之齋

雄關曉發

海上爭盟十六州燕雲西望颯深秋金縉空笑稱臣議
鼓角難銷割地羞易水波寒帆腹飽瓦橋霜滑馬蹏迢
木波去後遺殘壘衰柳棲鴉臘白溝

往平道中

舊年九月江南來今年十月江西去人生飄瞥如寒蓬
世事浮沈若曉露但知擁鼻吟四愁誰爲張髯說五蠹
凍雲潑墨壓征裘宿霧散絲溼沙路疲驢遠企東阿城
陽鳥先下高唐樹風饕老木吹竟空暖勒霜禽起還住
千莖白髮愁中生歲晏山空日遲暮無花莫問魯連村

有酒誰澆馬周墓青氍只恐誤儒冠悔不從前織漁具
十年詞賦歎病梨空鑄頑金六州錯

徐州渡黃河

河溜趨東仄沙樁接北低屋山如釜沒塔塔級共帆齊髡
柳經秋盡哀鴻入夜號幾家藏水帶好爲築金隄

渡潯陽

南歸仍復不還家兩度春明感歲華贏得青衫清淚溼
江聲嗚咽似琵琶

一聲征雁夜初霜書札鄉園正渺茫爲報故人憔悴甚
荻花楓葉滿潯陽

雪纔添一夜寒北來車馬路偏難風神應笑才情減

不比當時王子安

自九江登岸至東林寺

九江郭門辭松舟城隅一徑盤秋蛇梯青無屐陟危磴
遠睇已覺香鑪餘乾風蕭瑟刷僵木歸雲窈窕曳女蘿
側峰橫嶺不知處眼中突兀明青羸孟冬天氣特妍暖
交枝接葉開山茶田盤竹箐疑過虎天池沙冷聞飛鵝
仙鹿不可見兩首靈藥只恐生三桮東林咫尺亦難到
香山詩好誰能那忽聞流泉響竽筑虎谿已過金仙家
隱居只合在栗里攢眉吾意其蹉跎

寄阮集

辛未殘冬鑑去京師辭儀徵阮師已期年矣先生移

之書曰昔人以詩寄漁洋名其集爲寄阮今人不當如是耶鑑因輯其辛未一歲之作都爲一冊慨前塵之易謝思後會之無因郵寄東華聊爲請益壬申三之日張鑑書於西江學舍

鐵樹谿

寒雲發墨濃谿水亂深黑雨後竹箭流怒與石相直與夫褰其裳一步十偏側天低樹影沈道遠日輪屏荒塗披榛芳窹步躡黍稷誰令聞雞興及暮尙喘息一歌行路難從者面槁色天衢不可攀奮飛少兩翼吾家蒼雪開婦子習耕織何不歸去來時窮食我力

土岡

樹杪開新霽羣峰入望明
槍籬日及落暖水活東生時
候增鄉緒登高念遠行
袁江楊柳徧攀折不勝情

牛鼻山至分宜縣

重巒曲且長蒼然見平野
何許讀書臺遠倚鈴岡下
記昔嘉靖中盜柄釣叟假危言
抗忠愍一疏蹶飄瓦至今
冰山錄徒費寫官寫可憐
山水英不能洗醜醜羣巒頗
崦岫雜木盡姚冶松苗新粉拙
石罅哀湍瀉朗吟弇州
詩春田淚盈把

昌山峽

春山蒼蒼馬銜尾巨靈蹠處開
一門哀湍萬壑互奔注
盤渦虎眼搖松根吾來屏軒值
猛雨樓欄酣戰風雷吞

鐵索連船水深黑岸北卷墨朝雲昏洄洄巒翠未易出
衣棱宛鬣春濤痕須臾過峽雨亦緩水攄拂拂垂孤邨
平皋鵝鶴飛可下頽岸躑躅枝堪捫山家圓篷犢背臥
估客三板沙尾喧依然遠岫落煙海山頂亂插雲光繁
饋餽一氣滃遙樹高眺已失袁山尊涼波衝寒止復作
森森銀竹愁翻盆松巢自怖老鴿影茅屋欲斷桃花魂
半峰窈窕矗天外眾流蹴蹴爭一源長謠敵彼小海唱
摩崖安得淩朝暾

袁州見兒子滄

見汝袁州市依人計可憐離家過千里別我正三年歸
思浮雲外生涯漆鏡邊相看兩不語揮手一潸然

昌山道中口占

龍光石火且淹留
瞥眼眞成不繫舟
十日宜春臺下住
滿天梅雨似深秋

豪風猛雨動清晨
一望山嵐鼠尾皴
來向雨來去雨去
櫻欄花底過宜春

小路口

一峰如呖藥一峰如渴驥
高下十百峰眼纈不能記出
谷又入谷四面環溼翠
何處桃花源可望亦可至
山田園十雙茅屋架三四
開門春瀑飛隔陽竹雞睡
豌豆蔓交午蒼松粒最
厚老農罷春耕飯牛無一
事餘生何舉牢感慨輒心
醉安用絆塵鞿還家事荷
蕢仙鄉難淹留

荀興向鹿柴尙有棠梨華風急衣裳墜

灘行口號六首

巖石磬磬水勢回灘聲終古下晴雷誰教蟹雨蠻風裏
廿日虔州兩度來

一聲戩楫日方中纔過黃公第二洪
篙密曉吹山鬼雨
揪深夜上鱷魚風

篙師併力與灘爭數到銅盤尙幾程
石似江豚排浪出
人同秋雁帖波行

高榕無際綠陰圓望裏梅關但曉煙
主簿功曹鳥名多
不語數峰青入鵬鵠天

浪傳射虎過寒林並少叉魚渡曲潯
漁艇雨昏烏鬼集

叢祠月黑竹郎吟

青山鎮日急奔波下瀨船來一葉過不信南安在天上
全憑張李兩哥哥

雨中過攸鎮

細雨溼寒翠濃雲四面飛嚴風吹席帽凍色上秋衣
酒憑山市餐魚問釣磯人家半水閣盡日掩雙扉

小谿

已過南康縣天寒雁未飛水清漁戶少沙輭蔗田肥
歲暮憐羈客他鄉尙薄衣何年買陽羨早息漢陰機

礪桐館集

辛未冬西江學使者院火予雜文自己巳後者悉被焚

去詩集以行簾自隨得存十之六七旣而少宰師新其
官舍予屋背倚修桐一本初爲火氣所鑠焦萃其半慨
爨下之猶存託孤生之餘緒名其館宜名其集尤宜也
因輯壬申一歲之作名之曰礪桐館集張鑑識

二月二十二日渡章江

作客逢寒日臨流念遠行鷺拳春水活花發午峰晴盡
蝶雄藩去鳴鸞幕府輕愁同芳草綠隨意出江城

清明日見桃花

爛漫眞憐汝相逢楚水濱難邀劉子驥空對息夫人何
日逃塵鞅還家買釣輪春江高浪靜愁絕一枝新

星子縣曉發辭匡廬

星落宿鳥噉巾車遠將發無復款松門依然徑林窟晴
嵐敞九奇日午尙未沒盤盤石子山枳花殊已歇委鸞
不可逢遲回別瑤闕安得雲母碓使吾綠毛髮再與山
靈期秋巖采薇蕨

都昌縣

都昌三月雨濛濛路繞鄱陽湖水東寒澗百環鳴筑裏
煙嵐四面畫屏中嶺深茸鹿眠濃翠谷斷飢禽蹴碎紅
但有草堂牢結構不須料理乞盧鴻

弋陽

遙峰三十二幾折入清暉水急沈雲碓農閒掩竹扉四
圍樅檜密兩岸鷺鷥飛應歎勞生者漁樵無是非

途中見雁

一片瀟湘影相逢客路閒舊愁丁字沾新緒落星灣萬里寒雲白千峰夕照殷南來仍是寄春暮好飛還

北蘭寺

三年住章江將歸忽不樂已辭北蘭寺悵望秋屏閣微波碧於落靄葉歇復作春風解留人時向華裾落

過瑞洪

短櫂劃彭蠡今朝果到家谿明時見石波折忽生沙密樹疑成雨深山未著花不愁歧路失此去少三叉

貴谿道中

買得安仁三板船籬簾終日滯沿緣半篙活水生春雨

數點梅花破夕煙歸路已知嚴瀨近舊游曾過弋陽前
谷陵不改谿禽語女堞低迷露遠天

烏石灘

辭舟已登陸遵渚復舍輿窈窕烏篷船行行至桐廬青
山夾兩岸一水明空虛山家解種竹居人爭采魚豈謂
桃花源乃在義熙餘我欲買薄田此閒雜樵漁辟穀固
未能誅茅尚可居縱無麋鹿侶邈想羲農初試過香乳
巖鈔入桐君書

鷗鷺步

東漢羊裘翁乃娶梅福女世事有夙根麒麟不生兕當
其來吳市意已輕黃綺壻鄉日月間高節殆無比富貴

如浮雲妻子脫敝屣萬乘枉自屈堅臥不肯起無謂巢
許微事竟關天紀加腹哂狂奴伸足奏太史飄然還山
中山水清且美薄暮度釣壇寒風颭衣履想見千載前
投綸向谿水古人不可期長嘯動潛鯉

淮南集

予歸自西江未經兩月而雲師已以漕帥駐節淮陰書
來敦促遂買櫂過之留滯二年都爲一集雪泥鴻爪不
足喻其飄忽也時癸酉至甲戌凡十五月張鑑識

題阮梅叔先生珠湖漁隱圖

一領蓑衣踢浪遲記曾堆向晚晴時誰能璧社湖邊住
領略楊家七字詩

鏡面平揩淨不流老魚吹雪一湖秋明朝走馬蘭臺去
恐要珊瑚作釣鉤

吾家舊住茗谿曲荷葉當門不可芟叢話近來無一卷
可能同署隱君衙

臨頓里集

甲戌秋再自豫章還里將授徒鄉園不復作遠游之計
矣無如家無長物甌有餘塵分鄭虔之甌割華歆之席
不得已也因館潘師第卽其地以名之曰臨頓里集張
鑑春治甫識

鳳池園仿青丘次皮陸倡和韻十首同潘功甫
星齋紱庭昆季賦

臨頓橋邊宅高人舊卜居室縣留宿榻架插待鈔書看
木來馴鳥空潭上種魚看君振夕秀排纂定盈車

四壁泥新粉三重結舊茅階分蘆草席徑轉海棠巢樹
蕙扶長鍾浮醺列苦匏蒿萊渾不薙二仲近相交

菌閣開春畫花光映麋牀繪圖參字母鑄像禮詩王癖
潔鶴同瘦涇書蜂比忙詞壇牛耳在滕髀莫爭彊

柏久虬能舞梅芳蝶不知樓高鵲戶直人淡菊糧資丸
藥煩松子張琴喚雪兒巢居無一事日日有新詩

謾謾雙松閣蕙蕞六枳扉晚煙迷竹粉春雨長苔衣掠
檻流鶯過衝簾乳燕歸到來塵慮滌所得在元微

岸仄宜垂釣門閒少過車移廚看曝畫貯甕學澆花句

漏仙人并襄陽漫士家若教分片席列筭種營麻
每集分牋侶巖花信未殘夏涼風一簟春暖日三竿洗
硯搥荷袖投壺整籜冠日斜人散去展齒滿苔壇
倚杏沾紅雨團蕉展綠天高柯招宿鷺低刺礙飛蟬窗
下宜評帖鐙前愜注玄籠頭有紗帽親煮第三泉
閒閒剛十畝長日自關門讓月疏簾額防池護樹根藤
甕窺鏡局瓦雀浴山盆一獻如鸞鳳新桐又引孫
交呂吾何有攀嵇亦未能升沈魚鳥異朝野墨茶憎酒
郡桐圭錫香材鶴餉徵斜川游息地疏放得橫肱

題釣月圖二首

揭來吳市五年餘泊宅邨邊負網車只要一舟如舴艋

不妨震澤釣鱸魚

經時無雨驗秋星任祝萍號更不靈縱有志和新樂府

那堪吹簫教樵青

時亢旱六月不雨至八月

林屋洞天集

痕蹟卅載頗似游仙淡悶稍瘳欣然鼓櫂予來包山主人坐我於消夏灣之南樓每值古岸過雨高蘿蔭流偶有所作合爲一集壬午十月小羅浮山人張鑑識

蔣南沙相國畫雞冠花幅爲葛香士索賦

蓴鱸誰復計鄉思秋老江南尙未知惆悵東華門外見五更霜月早朝時

山亭景物九秋寒七尺珊瑚亞石欄不信平泉閒草木

西風總向畫圖看

題倪鴻寶山水香土索賦

歌舞豪華事已陳
衣雲閣迥黯傷神
豈知白馬清流禍
落落中朝有幾人

樹石蕭森氣味閒
不須刻意貌荆關
故應碧血千秋在
染作江南雨後山

題計秋琴種瓜圖

十載名場擺脫遲
孫生蘆菔芥添兒
秋琴與子近皆有孫
紫茄白

莧閒收拾自此同
師汜勝之

鹿眼笆籬牡蠣牆
一牛鳴地近東岡
邇來步隲無如我
虎掌狸頭好細量

舊屋谿南一徑穿
依然蘆雪并菰煙
無端觸撥東陵計
擬賃冬瓜堰外田

山薑葉老韭花初
南畝霜腴手自鋤
一笑今年秋思好
頭銜新署卞田居

茅齋長日肯留賓
說劍譚詩到每頻
折項爛蒸無不可
從今莫笑庾郎貧

寒山偕隱舊家風
可奈秋來雨腳空
祇恐朝朝行汲嬾
四婆裙後且相從

今年秋旱故用楊朴語以調之

葛母吳太孺人節孝詩

石公山頭千尺松
一枝慘裂冰霜容
良人遠去湘水曲
誰復佐餽兼尸饗
秋宵鬼母驅兩豎
阿婆牀上氣一縷

北辰難禱醫扁逃持匕向空淚濺雨一片剗落心上
相花燈暗天低昂還丹入喉痼疾起滿房散作旃檀香
烏頭之節一萬日到此方能入貞石澗中白石山頭松
血淚斑斑化成碧

爲陳抱之作學書圖成竝題三絕

辰州太守舊相從老去臨池筆未慵今日蠶芽仍斂手
魏他湖海兩元龍

予在武林曾爲陳柱堂太守廷慶作五十學書圖忽忽十餘載矣

墨妙亭荒失舊聞晴窗重與展谿紋肥環瘦燕誰爭得
都上羊家白練裙

立旆持刀古意存每將金石破朝昏俗書自是羲之體
不用靈脾驗漬痕

君金石皆有成書

徐若若息舫園圖

南州高士宿生緣記款園扉又隔年築室竟能連福地
隱居初未負花天銘心粉墨香爲櫝列坐琴樽屋似船
那不相期看玉茗到來須趁暮春前

和徐香圃山齋種菊之作

言有幽棲處山深似綺園交人成水淡種菊破霜痕笑
語春溫洽琴書古道存何時偕勝侶花外款衡門

桑苎園丁集

予每擬十畝一椽長作農人以沒齒而荏苒年光久而
未遂自癸未冬初旋里則一塵風雨不隔市閭雖水母
目蝦此境少舒而塵俗如故皮陸前志何日忘之苔上

張鑑識

題邵菊人鉏月種花圖

茅檐散谿雲月色忽到地
高人有花期中夜耿無睡
荷鉏破蒼苔鶴去人始至
轉覺香海嚴得此聞根治
吾亦山中人言念山中事
鄧尉春風時夢向重湖墜

黃小山畫鍾馗按樂圖爲吳月樓索賦

圖作一童吹洞

簫進士執鼓板和之

開元科第盛燕許終南之葵色先沮承明一試卽歸來
送窮無車通鬼語作使山精卜歸妹土伯方良豈其侶
三郎避瘴臺不成大鬼小鬼相縱橫花奴羯鼓玉環笛
殿前偷按同雷鳴爲梟爲蜮爲貫魚掖庭將作修羅城

先輩聞之齧兩齒百結欄衫尙利市手扶木怪追花妖
世上功名一夢耳糞除帝闕完宮縣節拍紅牙歌綠水
膏肓有豎眉如蛾環佩不歸金粟坡賚彌無人蜀岡幸
掀髯一笑還山阿試聽先輩鈞天唱較勝霓裳舊序多

僧幻圃秋山問道圖

打包行脚苦搏沙塵苑秋山路不賒誠重勞輕人莫笑
幾經進影撥煙霞

清涼高處翠紆盤落落長松八月寒知爾一鐙傳自昔
金沙脫屣本無難

貞松慈竹圖爲唐子珊作

江鄉門巷日悄悄松蓋凌霄竹翠深自是少年同百藥

秋風長抱歲寒心

畫眉橋下水通流鶯脰湖濬記繫舟他日北堂還拜母
勸栽諛草足忘憂

約友人訪菊

半年扶病罷閒行香滿東籬恰有情此再除花眞歲晚
忍教爽約負秋晴午峰趁日先魂斷寒蝶經霜但日成
安得宮方開酒禁陶然浮白足餘生

題沈退甫九熊圖

獵後天山一七鮮桐雷妙訣昔曾傳誰知顥顥盤中藥
心血丸成十五年

長年佐讀淚先枯看抱遺經入畫圖報答此心原有術

卻教書卷勝萱蘇

老去無成兩鬢寒
感人明發涕洟瀾
舊時經史渾忘卻
尙欲從君給一丸

痺風集

鑑於丙戌春自包山歸時年已五十有九不意復嬰風
疾幾至不起後漸能運轉不勝攀攬攷古人如習鑿齒
皇甫謐周續之諸儒均患是病甚至武人如哥舒翰晚
年亦深以爲累藉前賢之遺蹟歎我生之不辰遂綜其
詩曰痺風集貞疾居士鑑書

水災紀事冊爲王硯農索賦

道光三年吳中大水硯農以勸分倡於鄉因

屬蔣子延繪其事成十二冊己丑春過草堂
索詩因同其意

縣雨

水沒頭雨沒尾盲風兼句吹不已苦竹叢深日鳩語逐
婦聲高人轉哭老魚橫飛上鄰屋

蹋車

上留田水沒狗下濶田水漂曰三男五女蹋水車犂犂
确确蛻骨蛇杷頭菌出鎌衣長今年水腳過兩丈

築壩

蟻穴漏金隄大小理則齊屯皮木椿須應手鳴鑼集夫
防決口白版雙扉復何有

補種

夏至未至鵲旦叫勤者翻被惰者笑刺水綠鍼日夜黃
舩艫重買來山鄉補未完雨不止早秧遲秧一例死

風暴

五旬雨七月風黑雲如磐龍挂空石飛沙走作風暴老
鼃入市瘦蛟導帝遣天吳爲海嘯

報荒

鴛鵝飛飛滿四野此災百年僅見者扶老挈弱號縣門
縣官何日行鄉鄰不是風潮小損稼撾鼓攀轅府帖下
流徙

邨邨移家具爭權楸頭艇何許可藏身梯空羨松頂蛙

產龍魚入門跳珠急雨還翻盆

撈棺

白楊樹根浪頭大破冢漆鐙無一箇兩和已齧題字稀
撈來撈去滿釣磯陽侯虐過摸金尉忍此萬千若敖之
鬼無所歸

勘災

涇旗吹船鳴菰蒲魚頭小吏左右趨宮來勘災行不紆
里正諾諾復喑喑青黃無期患煎迫茫茫殆徧魚鱗冊
大振

梵鐘初動寺門啟

皇仁給帑復給米朝起望晨光車輪歷碌摧肝腸道長

腹餒走且僵蘆蕨暮卷上北邙

蘆蕨見南史劉歊傳

助振

常平倉空當勸分指囷納粟沸若雲春陵宰固美子敬
心亦勤論升論合論鎬黍魚行蟻戴未滿筥挖肉補瘡
不如稭

春熟

一年無禾猶可十年無蠶則那桑空閒斧柯鉤絲不上
鄰女梭良苗懷新幸春熟交午漲痕在頰屋牆角枯桑
長苔綠

輓計秋琴

谿南辛愿久知交卅載人琴竟永拋卽酒可沽常劇醉

異書能借許傳鈔半窗殘墨留餘瀋三徑秋花圻舊苞
記得少年同讀處不堪簾戶網蠨蛸

題張春水載酒盟鷗圖

湖上香林記結鄰舊游漂泊等游塵重來搖碧齋中坐
多愁閒鷗亦避人

題王臺叔石公攬勝圖

四年住林屋疾被煙霞痼既習崦裏行復縱矚中步芝
髓固難期園綺有時遇別來六七稔夢繞曲巖樹之子
墨佐君乃擅濟勝具籬條八尺風一鳥衝煙渡山根證
石板靈修導先路上梯摩蒼穹下肺墜寒霧仙陽鬱盤
礴精藍莽回互此時拜東野雲龍願比附吾昔成洞書

予在包山成洞 聚米若計數譬之孤竹馬索塗免迷誤
書得十六篇 好處無境刪好境無處住二句襲美明月灣詩也西峰復東灣太
息松陵句名利何不捐魚鳥且無妒相約在耦耕登高
尙能賦

春水以癸未水屋圖屬題率成一絕

水利三災本可商十年往事欲沾裳眼中老屋依然在
人說雲龍舊草堂

汪半壁

一繫

別三十載今年以略似人形圖索

題爲書五絕

嗒然槁木且忘形中有天全特自銘說與二豪渾不識
螺贏終日祝螟蛉

紛紛牛馬任人呼漢柏秦灰志未孤幸不似他陶學士
免教依樣畫葫蘆

媼妍都在水中央夢醒華胥枉主張得骨得皮皆自取
與君竿木且登場

百年過眼閱風鐙作畫評詩苦沸騰聞道東坡有交割
窮人具又付聾丞

琅嬛館裏逢君後難倩長繩駐日馳三十年來一彈指
轉眉同不似前時

輓金山甫

硯席開窮巷天教一月留才原難活命貧竟不堪憂家
計朋儕賴遺編弟子收兌庵

新寓齋名

花草在身世比蜉蝣

長夏有懷鐵花抱之

火雲蒸得肉山頽長日拋書望落暉誰似谿西入义手
圖經十道晚涼開
一麾江左氣如雲金石時時聽策勳三載相思不相見
故山猿鶴恨移文

許海樵以其徒種竹圖索詩因書

田園雖轉蕪經史豈云熟抱此歲寒心苦未離塵俗吾
友不速來示我紙一束言得王子猷繞池植修竹能詩
交賢豪礪礪多節日時持冰雪文步出西堂讀秋深巾
舄涼日薄須眉綠我欲往從之相期海隅麓何以致勿
談願借宅南屋

硯農以蔣子延令子仲離畫見示題句奉懷
不見蔣君久艱難藉子扶浪傳支酒票笑比論癡符攘
攘人情熟區區吾道孤何時憑短櫂重過尉城蘆

井叔集

予既編正集意謂此後當十年成一編今自戊子至丁
酉忽忽浹旬中秋前溽暑啟門命孫徒輩秋蛇春蚓錄
爲一裘而四方友朋猶追索不已將更發軔無以名集
余左手舊有文作井字初不自揆取以題之易曰井養
不窮七十之年復何可冀幸無代庖之累當免臣媵之
羞丁酉中秋日張鑑識

計二田

光祈

冷音閣校詩圖

卷之二
二田得其族祖萊邨遺詩將校而刊之乃譜
此圖萊邨甫草子也祖青麟先生復社巨擘
高閣疏林外攤書日掩門淵源文苑舊家世黨人尊葉
埽秋鐙永鉛研春露繁百年聊晤對風雨正忘言

采藥引贈醫者陸蘭畹

世無桐君與雷公靈苗天闕深山中先生好古具妙用
遠接陶葛追游蹤手持綠玉杖力求上藥還神農華佗
弟子吳普注不得散出四海誇元功吾少圖不朽咽氣
服食亦時有失足輒紅塵六十歸來不良走三椽人獲
愁刀圭九節菖蒲虛枉日意苴無功芎藭荒長年咄咄
望山陂知君濟世肯招邀欲往從之不憚遙垂雲笈長

生瓢衫子四尺須紅蕉木瓜酒注魏惠壺青菁飯鈔不
挂杓縱無長耳號雪精且買兩角名郭椒花前相見一
笑驪誰其畫者入丹粉先生自是古接輿予非張果亦
張蘊五童橋栗朮葛拙日刷長鏡試松菌爛柯山下迴
巾車金華洞中滯修軫長卿花簡子藤取之以證本草
經金匱玉版始可讀圖之說之皆真形有唐蘇恭掌禹
錫所不能續李時珍書宜羞稱朱文墨蓋一一分別斯
足徵

王少呂以所葉話雨樓碑帖錄目寄詒因索爲
秋夜校碑圖圖成題長歌報之

近人金石談覃谿於北竹汀南金石證經史竹垞亭林

亦如此職官地誌厯與書一一穿穴爲佃漁探源火鑿

腦自宋彼夾漈鄭猶拘虛鼎足之三洪趙歐劉球 機

楊詢 辭 尚功同一工到今儀徵之阮鎮洋畢裒然巨裘

追前修青浦萃編隘千載陽湖碑錄凌九州其外瓦當

及錢品於此分派爲支流我生同餓隸換少碑礫覓無

計半世奔波眼力窮轉手煙雲徒雪涕岐陽獵碣天一閣

拓陶陵銅積古齋舊藏此器王子黜鼎藏虎丘寺泰山礪

琅邪臺拓本華嶽碑全揚州阮氏所得散盤工此器舊藏徽

使貢入內府見必摩挲日校諦歸來一掃四壁空秋宵耿耿

夢必通君才毋乃楊南仲 劉 原甫亞有此奇特寄我使

我至老而相逢舊傳旣充箱新獲亦照軫世皆汎濫已

獨峻整著其手錄焚被篡并滿堂賓侶眉共揚舉由豪

貴目敢晒夜闌高燭思慮情洗滌塵根開百城劉杏肉

譜各貫串宋綬掌固非支撐繭絲牛毛皆入據直與二

十四史相縱橫因君博物肝肺熱落月停雲思轉切千

墨庵昔聞壻鄉舊友袁綬階壻貝氏昔清愛堂今官鞏

昌諸城劉燕庭嘗從子游去年官汀州守時曾一人半

爾朱右甫爲弼老以風病滯侍郎愛而不見路阻長欲

往從之河無梁祇有兩鐵嚴鐵橋可均居今稽古日在

旁噫噦乎願君密寶弗炫曜世閒巧偷豪奪皆自召獨

不見趙宋向公明按圖索駿半由長城劉瑄成又不見

李唐釋辨才賣蠶種來朝夕唯宿醒縱使重梁複檻藏

之尙不可世豈少此蕭翼一輩能賺之狂生

聞川十二詠爲二田作

花街

春曉先鳥起出門風吹衣豈知桃李花開近枯禪扉

楊柳灣

陂牀微雨停閒鷺下髡柳無處無漁莊得魚亦酤酒

東禪寺

修竹何戢戢十笏延涼風無以答此君慚彼長帽翁

合谿別業

故宮亂紅兜瞥眼一風葉金粟今不來雲堂遺梵笈

蓮花墩

淨綠唾不可游魚逐成隊名曰小滄浪切弗語襍襪

水月林庵

浮萍冒朱華四壁無纖塵會買缺瓜艇結此香月鄰

一宿庵

那無桑下戀劫塵浩莫數屋山有平仲崢嶸歲月古

雪龕

瓶拂寒山來誅茅習清聽詩侶苦難招獨敲初夜磬

冠鼈亭

長虹偃平波秋來皓如鏡月午絕無人水天相於永

劍嘯臺

何年築高臺夜氣終不歇不知千載下誰復張雷掘

菊隱祠

誰種東籬花祠堂緬修甸至今南村人長共寒泉薦

蘆涇

蘆花白露初湛湛一方水何處覓伊人伊人正在此

題二田看茶啜墨圖

試茶取其白貯墨取其黑欲黑漆不如欲白雪亦失人
心未會事物論豈終極夫君大雅倫嗜好異耳食一甌
龍團妍百挺烏玦襲蔡藝長畏勞滕癖又苦涇兩捨固
爲難兼收意甚得活火發奇香緩磨出妙汁脣沾同制
酒目成如達色臥言任哲黔高風領操德終日硯鑪旁
白黑兩不惑揚雄且草玄老聃但虛室

題陸贄鄉

鎮

鬱林山館圖

吳趨諸陸朱兩轡族均顧氏源平原鬱林太守尤廉潔
歸裝載石爲高門佳人南國首二妙屋東西住兩弟兄
眼中兀突見此館士龍名復眾口喧書藏千卷硯北富
詩吟萬首鑑曲尊交讓樹邊逸牀竈海棠巢底羅琴樽
萬步計畝恒苦水一欄養鴨還解言人患才少子患多
新語成當貢

九閭仰天大笑過江去鬚囊影亂江水渾牽犬聽鶴各
有志毀茶品水同弗諼他年相訪臨頓里何知不是桑
苧園比肩有人可偕隱十友方外安足論

萬柳堂爲阮師補作

丙寅在揚雲師屬賦湖莊雜詠八首其二爲
三十六陂亭及己亥師懸車改爲是堂書來
告易爲補一首寄呈

舊游黑窯廠景物略相似深柳與新荷驟雨叶宮徵異
日抱經來師眞廉孟子

南陽邨圖歌

桐涇鎮市尾曰南陽邨有舊廣宅三面環水
蒼藤老樹百年物也蘭川得之將移居遣人
徵詩畫因成此寄之

君家老屋涇水濱近復卜築來南邨水三面環隔咫尺
舊時喬木今猶新長廊曲檻極天趣疏簾淨几無纖塵

百年蒼松作蛟吼十圍古檜疑夔蹲山薑倚牆放疏蕊
珠藤壓架交長根家具雖少有雞犬洪崖婦子顏溫存
汗牛經史萬卷富充箱金石千番屯日長無事坐花下
歐趙洪薛殊斷斷細入蛛絲大鵬翼妙悟直欲追先秦
昨朝遣人要詩畫錢郎結習羞王孫水邨圖趙松雪爲錢氏作或云
鶴書旋赴隴玉堂失卻茅檐眞蛾眉班缺且促駕轉眼
釋褐離隱淪君聞鼓掌忽騰笑孔移無乃猿鳥噉昌黎
盤谷豈妄語吾非惡此逃其身嗟余老大分桑苧出處
遑敢多求人盍不抽帆指涇水披抹風月來打門空齋
登登脫以紙圈公石坐子尾樽前禾訪碑況羅致攜歸
攷索忘朝昏硬黃響榻必工緻求古尋論尤精醇須知

飲啄亦有數致此正壑寧無神自非水木兩明瑟平生
夙好何由敦柴桑舊宅倘許到淵明集有南鄉詩松齡及野皆
鄉親

陰雨謠題客窗哭友圖

陰雨復陰雨嘯鳩深樹裏五倫無古今七情無朝市唐
衢縱善悲陸機不長喜先笑後號咷旅人良有以吾黨
王詠之久交陶雲史夢魂常往還賓主互彼此憶昨辛
丑秋風信動魚鯉南邨不自意直至梨花里里門多荆
高十五相以齒盤核羅炙漿戶外滿纂履時時響秋潮
談笑雜倚徙阿誰荻塘來經過楔湖涖從人問王昌一
病竟至死坐客聞此言低頭及交耳雲史聞此言淚落

如鉛水須臾注長河漣漣不自止舉座爲不歡向隅胡
乃爾或疑好酒悲朱翟莫浪比晨興促歸航行行望桑
梓火速啟藤笥煙墨出深旨故人有難兄水驛急遞似
今朝款柴扉硯農用舉視詩作孝節徐畫過指揮紀展
罷且前席一一通其指斯人直古人待物少渣滓烏有
閨堂飲歡笑方倍徙一聞來者言淚落如鉛水須臾注
長河漣漣不自止予能無一辭薄敦懦夫起再拜受其
冊氣結口徒哆嗟嗟君弟昆交余亦有在前年我刻書
淨本復誰待何圖手腕脫奄奄日以殆剗厠縱無期轉
盼失光采亦旣序其詩叢殘實董理地下苟有知老眼
溼清泚吾聞哭有二此道得之禮有畏固交頤有愛每

雪涕畏愛兩不關是豈涉譽毀齊衰孟嘗悲漢替許慶
恥友朋次君父仁義動君子懷哉聊還歸兩目久枯矣

柳如是青田石書鎮

石長二寸有半廣二分之一刻山水亭樹款曰傲白石

翁筆小篆頗工紋面鐫崇禎辛巳
暢月柳藤蕪製今藏王硯農處

寫罷烏絲笑破錢

謂錢岱勳爲姬捉
刀人見王灃詩注

筆牀硯匣日周旋

歸家園裏傷心樹轉手滄桑二百年

山莊紅豆正花開花底齊牢酒一杯展向春風重太息

絳雲書卷久成灰

漏澤引

硯農索爲震澤左邑侯賦

宋時吳縣化人亭地在城外通濟寺風雪夜倒僧求復

當路不許禁轉厲縣尉者誰實黃震痛切作文戒後世
邇來又閱幾百年變爲漏澤差強意出斯以降官弗知
各聽其鄉自爲計醵錢略仿漢酺飲買豕北郎掩枯骸
濫觴無殊效有殊不在初難貴終易余家三世預茲役
縱乏贏金每攘臂不才奔走在衙署嘗經苦口告大吏
梅堰一集雖彈丸不少賢豪傾筐筥吾友王君性氣麤
遇發亦時見古義汲深綆短或不續黃金擲牝那可繼
有時囊底無一錢棄置兩難輒驚悸必諧羣力方克濟
焉得青蚨歲常至左侯一身湖海豪耳目頓新民物氣
花日茅檐詢疾回清俸親顏掀兩袂前黃後左轍不同
一則滌惡一扶墜譬如山壑藏巨舟大力負之釋其累

冬之二
書來邀我作長句秦中吟亦樂天志朝朝枯樹叫鵲鷯
夜夜青燐出薜荔但使民間利孔多蚩蚩儘自愛同類
急義千秋有替人野史鄉碑丞相誌

題鷺湖餞別圖用潘稼堂太史平波臺韻送王

冶亭少尹

鈞

道州詩裏尋循吏縱使遄歸去復來訪友每停花外舫
催耕時上水心臺柳濃共擘臨分袂波白還徵後會杯
滿眼雲霞想揮手畫眉橋畔暮帆開

冬青館乙集卷二